

**Tiada layanan istimewa untuk Anwar di penjara, kata Putrajaya**  
**The Malaysian Insider**  
**Feb 11, 2015**

Timbalan Menteri Dalam Negeri Datuk Seri Dr Wan Junaidi Tuanku Jaafar tidak membenarkan Jabatan Penjara memberi sebarang layanan istimewa kepada Datuk Seri Anwar Ibrahim sepanjang tempoh lima tahun beliau menjalani hukuman di Penjara Sungai Buloh.

Wan Junaidi berkata, sekiranya Jabatan Penjara memberikan layanan istimewa terhadap ketua pembangkang itu, maka jabatan terbabit tidak berlaku adil kepada semua banduan.

"Kita tidak boleh beri layanan 'lima bintang' kepada bekas orang kenamaan atau jutawan yang dipenjara selepas disabitkan kesalahan, manakala pengemis pula dalam keadaan teruk.

"Semua pihak yang didapati bersalah oleh mahkamah, mendapat layanan yang sama daripada Jabatan Penjara (sesuai dengan status banduan).

"Bagaimanapun, Jabatan Penjara boleh memberi kemudahan (berlainan) kepada penghuni penjara atas sebab tertentu, seperti isu perubatan," katanya seperti dilaporkan akhbar Berita Harian hari ini.

Katanya, Ketua Pengarah Penjara Datuk Seri Zukifli Omar boleh pertimbangkan tentang kemudahan tertentu sekiranya banduan berdepan dengan masalah kesihatan dan beliau akan membuat keputusan berdasarkan laporan kesihatan diterima.

"Buat masa ini, tiada keputusan Anwar akan menerima sebarang layanan istimewa," katanya.

Pada masa yang sama, beliau memberitahu ahli keluarga Anwar dibenarkan melawat ketua umum PKR itu pada hari dan waktu yang ditetapkan Jabatan Penjara.

"Selain itu, pertubuhan bukan kerajaan (NGO) seperti Bulan Sabit Merah Malaysia juga boleh memohon untuk melawat Anwar. Ada peraturan yang perlu dipatuhi oleh semua pelawat," katanya seperti dilaporkan.

Anwar disabitkan kesalahan dalam rayuan kes Liwat II semalam dan Mahkamah Persekutuan memutuskan hukuman lima tahun penjara sebagaimana ditetapkan Mahkamah Rayuan.

Mahkamah juga mengetepikan permohonan pihak pembela yang meminta hukuman lebih ringan daripada yang dijatuhkan Mahkamah Rayuan sebelum ini, pada masa sama menolak permohonan pihak pendakwa yang mahu hukuman ditingkatkan.

Sebelum hukuman dijatuhkan semalam, Anwar menyerang panel lima hakim yang mensabitkan beliau bersalah dengan menuduh mereka "tunduk kepada tuan politik dan menjadi rakan jenayah dalam pembunuhan sistem kehakiman". – 11 Februari, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tiada-layanan-istimewa-untuk-anwar-di-penjara-kata-putrajaya>